

摘藻堂四庫全書薈要

史部

欽定四庫全書薈要卷九千六百二十

史部

文獻通考卷二百九十八

鄒陽馬端臨貴與著

物異考四

火災

春秋桓公十四年八月壬申御廩災董仲舒以為先是四國共伐魯魯君臣內怠政事外侮四鄰非能保守宗廟終其天年者也劉向以為御廩夫人入妾所舂米之

藏以奉宗廟時夫人有淫行

通於齊侯

挾逆心

欲弑桓公

天戒若

曰夫人不可以奉宗廟

莊公二十年齊火災劉向以

為齊桓好色以妾為妻嫡庶屢更故致火災

僖公二

十年五月乙巳西宮災董仲舒以為僖娶於楚而齊媵

之脅公立為夫人西宮小寢夫人所居也若曰妾何為

居此宮誅去之意也

宣公十六年成周宣榭火榭所

以藏樂器宣其名也董仲舒劉向以為十五年王札子

殺召伯毛伯天子不能誅天戒若曰不能行政令何以

禮樂為而藏之 成公三年二月甲子新宮災穀梁以

為宣宮一曰宣公弑子赤而立不當列於羣祖故天災

其廟 襄公九年春宋災晉侯聞之問士弱曰宋災於

是乎知有天道何故對曰古之火正或食於心或食於

味以出入火

師古曰味音竹救反

是故味為鶉火心為大火陶唐

氏之火正閼伯居商丘祀大火而火紀時焉相土因之

故商主大火商人閱其禍敗之釁必始於火是以知有

天道公曰可必乎對曰在道國亂亡象不可知也

韋昭曰大

亂之君天不說曰古之火正謂火官也掌祭火星行火復告故無象

政季春昏心星出東方而昧七星鳥首正在南方則用

火季秋星入則止火以順天時救民疾帝嚳則有祝融

堯時有閼伯民賴其德死則以為火祖配祭火星故曰

或食於心或食於昧也相土商祖契之曾孫師古曰契讀曰僕音

先列反字或作焉其用同耳據諸典籍相土即高之孫今云曾孫未詳其意代閼伯後主火

星宋其後也世司其占故先知火賢君見寢能脩道以

除凶亂君亡象天不譴告故不可必也 三十年五月

甲午宋災劉向以為先是宋公聽讒而殺太子痤應火不炎上之罰也 昭公六年六月丙戌鄭災是春三月

鄭人鑄刑書士文伯曰火見鄭其火乎火未出而作火

以鑄刑器藏爭辟焉

著刑於鼎故稱刑器
法設下爭故云爭辟

火而象之不

火何為說曰火星出於周五月而鄭以三月作火鑄鼎

刻刑辟書以為民約是為刑器爭辟故火星出與五行

之火爭明為災其象然也又棄法律之占也 九年夏

四月陳火時楚靈王滅陳鄭裨竈曰五年陳將復封封

五十二年而遂亡子產問其故對曰陳水屬也火水妃也而楚所相也今火出而火陳逐楚而建陳也妃以五成故曰五年歲五及鷄火而後陳卒亡楚克有之天之道也說曰顓頊以水王陳其族也

師古曰陳舜後也舜本出顓頊

今茲

歲在星紀後五年在大梁大梁昴也金為水宗得其宗而昌故曰五年陳將復封楚之先為火正故曰楚所相也天以一生水地以二生火天以三生木地以四生金天以五生土五位皆以五而合而陰陽易位故曰妃以

五成然則水之大數六火七木八金九土十故水以天
一為火二牡木以天三為土十牡土以天五為水六牡
火以天七為金四牡金以天九為木八牡陽奇為牡陰
耦為妃

師古曰奇音居宜反

故曰水火之牡也火水妃也於易坎

為水為中男離為火為中女蓋取諸此也自大梁四歲

而及鶉火四周四十八歲凡五及鶉火五十二年而陳

卒亡火盛水衰故曰天之道也哀公十七年七月己卯

楚滅陳 昭公十八年五月壬午宋衛陳鄭災董仲舒

以為象王室將亂天下莫救故災四國言亡四方也

定公二年五月雉門及兩觀災

師古曰雉門公宮南門也兩觀謂闕

董仲

舒劉向以為此皆奢僭過度者也先是季氏逐昭公昭

公死於外

師古曰謂死於乾侯

定公即位不能誅季氏又用其邪

說淫於女樂而退孔子

師古曰齊人歸女樂季桓子勸定公受之君臣相與觀之廢朝

禮三日孔子乃行

天戒若曰去高顯而奢僭者一曰門闕號令

所由出也今舍大聖而縱有罪亡以出號令矣京房易

傳曰君不思道厥妖火燒宮哀公三年五月辛卯桓

釐宮災董仲舒劉向以為此二宮不當立違禮者也哀公又以季氏之故不用孔子孔子在陳聞魯災曰其桓釐之宮乎以為桓季氏之所出釐使季氏世卿者也

四年六月辛丑亳社火

師古曰亳社殷社也

董仲舒劉向以為亡

國之社所以為戒也

師古曰存其社者欲使君常思敬慎懼危亡者也

天戒若

曰國將危亡不用戒矣春秋火災屢於定哀之間不用聖人而縱驕臣將以亡國不明甚也一曰天生孔子非為定哀也蓋失禮不明火災應之自然象也

漢惠帝四年十月乙亥未央宮凌室災

藏冰之室

丙子織室

災

織作之室

劉向以為太后立魯元公主女為皇后凌室所

以供養飲食織室所以奉宗廟衣服與春秋御廩同又
天戒若曰皇后亡奉宗廟之德將絕祭祀其後帝崩后
亡子取后宮美人子立之呂后崩諸呂為亂大臣誅之
而立文帝惠后幽廢 高后元年五月丙申趙叢臺災
劉向以為時呂氏女為趙王后嫉妬將為讒口以害趙
王王不悟卒見憂死 文帝七年六月癸酉未央宮東

闕果恩災

師古曰果恩謂連闕曲閣也以覆重刻垣墉之處其形果恩然一曰屏也果音浮闕與其

兩傍俱災也

劉向以為東闕所以朝諸侯之門也果恩在其

外諸侯之象也漢封諸侯王連城數十賈誼等以為違古制度必將叛逆先是淮南濟北皆謀反其後七國舉兵而誅景帝中五年八月己酉未央宮東闕災時栗太子以罪廢自殺丞相周亞夫下獄死武帝建元六年六月丁酉遼東高廟災四月壬子高園便殿火董仲舒對以春秋時亳社兩觀桓釐廟災四者皆不當立天

皆燔其不當立者以示魯今高廟不當居遼東高園殿不當居陵旁於禮亦不當立與魯所災同

按古者諸侯不敢祖天子則高廟不當立於遼東也古者墓以藏體魄廟以宅神靈故祭於廟不祭於墓則高園殿不當居陵旁也二者皆失禮之事謂天燔其不當立者以示警猶之可也而仲舒所對累數百言至謂天災若語陛下視親戚貴屬在諸侯遠正最甚者忍而誅之如吾燔遼東高廟視

近臣在國中處旁仄及貴而不正者忍而誅之如
吾燔高園殿大槩勸帝以多行殺戮而於郡國陵
墓不當立廟之說略無所發明帝采其說而使仲
舒弟子呂步舒治淮南獄深竟黨與坐死者甚衆
蓋此對徒足以啟帝之忍心而略不能革漢之失
禮矣故祇取其兩言而餘語則盡削之云

武帝太初元年十一月乙酉未央宮栢梁臺災先是太
風發其屋夏侯始昌先言其災日後有江充巫蠱衛太

子事 昭帝元鳳元年燕城南門災劉向以為時燕王

使邪臣通於漢為讒賊謀逆亂南門者通漢道也 四

年五月丁丑孝文廟正殿災劉向以為是歲正月上加

元服有明哲之性而大將軍光久秉政不歸亡周公之

德將為國害故正月加元服五月而災見古之廟皆在

城中孝文廟始出居外天戒若曰去貴而不正者宣帝

既立光猶秉政驕溢過制妻顯弒后隨以誅滅 宣帝

甘露元年四月丙申中山太上皇廟災甲辰孝文廟災

元帝初元三年四月乙未孝武園白鶴館災劉向以

為先是前將軍蕭望之光祿大夫周堪輔政為佞臣石

顯許章等所譖望之自殺堪廢黜明年白鶴館災園中

五里馳逐走馬之館

五里者言周回五里

不當在山陵昭穆之地

天戒若曰去貴近逸遊不正之臣將害忠良後章坐走

馬上林下烽馳逐免官

夜於上林苑下舉火馳射也

永光四年六

月甲戌孝宣杜陵園東闕南方災時上復用周堪張猛

等石顯終欲害之園陵小於朝廷闕在司馬門中內臣

顯之象也孝宣親而貴門闕法令所從出也天戒若曰去法令內臣親而貴者必為國害後顯卒害猛

按魯哀公三年桓僖宮災左傳載孔子在陳聞火曰其桓僖乎杜征南注以為桓僖親盡而廟不毀故天示以災公羊傳之說亦然蓋踰禮制而以諂瀆事神則神亦不享其祭故天降之災非曰桓僖有以獲罪於天而火焚其廟也至仲舒劉向則謂以季氏之故桓則季氏所出而僖則使季氏世卿

者於是以為其咎不在當時之君而歸過於祖宗
其說鑿矣至其論漢世以來之災異如高廟之火
以為為諸侯王大臣文廟之火以為為霍光宣廟
之火以為為石顯夫諸侯王之過制霍光之專擅
石顯之姦欺所以致之者時君之過也於先代何
預且曰貴而不正者天燔之是天欲示警於子孫
而焚其祖宗之廟蓋亦迂遠而不切矣况宗廟人
主所嚴事者也災延宗廟變異不小不思側身脩

行以謝天地祖宗而方且以驕恣專擅之臣擬之
以為天惡而欲燔之以示戒其說不亦謬乎

成帝建始元年正月乙丑皇考廟災初宣帝為昭帝後
而立父廟於禮不正又時大將軍王鳳擅朝將害國家
故天見象 鴻嘉三年八月乙卯孝景廟北闕災十一
月甲寅許皇后廢 永始元年正月癸丑大宮凌室災
戊午戾后園南闕災時趙飛燕大幸許后既廢上將立
之故天見象於凌室與惠帝四年同應又戾后起於微

賤與趙氏同應天戒若曰微賤亡德之人不可以奉宗

廟將絕祭祀 四年四月癸未長樂宮臨華殿及未央

宮東司馬門災六月甲午孝文霸陵園東闕南方災長

樂宮成帝母王太后所居也未央帝所居也霸陵太宗

盛德園也時太后三弟相續秉政舉宗居位充塞朝廷

將害國家故天象仍見 哀帝建平三年正月癸卯桂

宮鴻寧殿災帝祖母傅太后所居也時傅太后欲與成

帝母等號齊尊大臣以諫獲罪後三年帝崩傅氏誅滅

平帝元始五年七月己亥高皇帝原廟殿門災盡時
平帝幼王太后臨朝委政王莽將篡漢祚墮高帝宗廟
故天象見也

王莽地皇三年二月霸橋災數千人以水沃救不滅
後漢光武建武六年十二月雒陽市火二十四年正
月戊子雷雨霹靂火災高廟北門 明帝永平元年六
月己亥桂陽火飛來燒城寺 章帝建初元年十二月
北宮火燒壽安殿延及右掖門 元和三年六月丙午

雷雨火燒北宮朱爵西闕 和帝永元八年十二月丁

巳南宮宣室殿火時帝幸北宮竇太后在南宮明年竇

太后崩 十三年八月巳亥北宮盛饌門閣火時和帝

幸鄧貴人陰氏以罪廢死立鄧貴人為皇后 十五年

六月辛酉漢中城固南城門災此孝和皇帝將絕世之

象也其後二年帝崩殤帝及平原王皆早夭和帝世絕

安帝永初元年十二月河南郡縣火燒殺百五人

二年河南郡縣又失火燒五百八十四人四月甲寅漢

陽河陽城中失火燒殺三千五百七十人先是和帝崩

立殤帝復早天平原王勝有廢疾乃更立清河王子是

為安帝 四年三月戊子杜陵園火 元初四年二月

壬戌武庫火燒兵物一百一十五種直千萬以上時羌

叛大發兵禦之積十餘年天下厭苦兵役 延光元年

八月戊子陽陵園寢殿災凡災發於先陵此太子將廢

之象也若曰不當廢太子以自翦如火不當害先陵之

寢也明年上以讒言廢皇太子為濟陰王後二年宮車

晏駕中黃門孫程等十九人起兵殿省誅賊臣立濟陰

王 四年秋七月乙丑漁陽城門樓災 順帝永建三

年七月丁酉茂陵園寢殿災 古今註曰二年五月戊辰
守宮失火燒宮藏財物盡

四年河南郡縣
失火燒人六畜 陽嘉元年恭陵廡災及東西幕府火

古今註曰十二月河南
郡國火燒廬舍殺人 太尉李固以為奢僭所致陵之

初造禍及枯骨規廣治之尤飾又上欲更造宮室益臺

觀故火起幕府燒材木 永和元年十月丁未承福殿

火 臣昭按楊
厚傳是災 先是爵號阿母宋娥為山陽君后父梁商

本國侯又多益商封商子箕不襲父爵別封襄邑侯皆

過差非禮 漢安元年三月甲午雒陽劉漢等百九十

七家為火所燒

古今註曰火或從室屋間物中不知所從起數月乃止

後四年宮

車比三晏駕建和元年君位乃定 桓帝建和六年五

月癸丑北宮掖庭中德陽殿火及左掖門時梁冀挾姦

譖殺太尉杜喬是後梁太后崩梁氏誅滅 延熹四年

正月辛酉南宮嘉德殿火戊子丙署火二月壬辰武庫

火五月丁卯原陵長壽門火先是亳后因賤人得幸號

貴人爲后上以后母宣爲長安君封其兄弟受寵隆崇
又多封無功者去年春白馬令李雲坐直諫死至此禁
除心尾火連作 五年正月壬午南宮丙署火四月乙
丑恭北陵東闕火戊辰虎賁掖門火五月康陵園寢火
甲申中藏府承祿署火七月己未南宮承善闥內火
六年四月辛亥康陵東署火七月甲申平陵園寢火
八年二月己酉南宮嘉德署黃龍千秋萬歲殿皆火四
月甲寅安陵園寢火閏月南宮長秋和歡殿後鈎盾掖

庭朔平署各火十一月壬子德陽前殿西閣及黃門北

寺火殺人

袁山松書曰是時連月有火災諸官寺或一日再三發又夜有訛言擊鼓相驚陳蕃劉志

茂上疏諫曰古之火皆君弱臣強極陰之變也前始春而獄刑慘故火不炎上前入春節連寒木冰暴風折樹又八九州郡並言隕霜殺菽春秋晉執季孫行父木為之冰夫氣弘則景星見化錯則五星開日月蝕災為已然異為方來恐卒有變必於三朝惟善政可以已之願察前言不棄愚忠則元元幸甚書奏不省 九

年三月癸巳京都夜有火光轉行民相驚譟

袁山松書曰是時宦

豎專朝鈎黨事起上尋無嗣陳蕃竇武為曹節等所害天下無復紀綱

靈帝熹平四年

五月延陵園災

光和四年閏月辛酉北宮東掖庭永

巷署災

陳蕃諫云楚女悲而西宮災不御宮女怨之所致也

五年五月庚申德

陽前殿西北入門內永樂太后宮署火 中平二年二

月己酉南宮雲臺災庚戌樂城門災

南宮中門

延及北闕道

西燒嘉德和歡殿案雲臺之災自上起檁題數百同時

並然若就縣華鐙其日燒盡延及白虎威興門尚書符

節蘭臺夫雲臺者乃周家之所造也圖書術籍珍玩寶

怪皆所藏在也京房易傳曰君不思道厥妖火燒宮是

時黃巾作慝七州二十八郡同時俱發百姓死傷過半

靈帝虐侈滋甚官非其人政以賄成天戒若曰放賢賞
淫何以舊典為故焚其臺門祕府也其後三年靈帝暴
崩繼以董卓之亂火三日不絕京都丘墟 獻帝初平
元年八月霸橋災其後三年董卓見殺

魏明帝太和五年五月清商殿災初帝為平原王納河
南虞氏為妃及即位不以為后更立典虞車工卒毛嘉
女為后后本仄微非所宜升以妾為妻之罰也 青龍
元年六月洛陽宮鞠室災 二年四月崇華殿災延於

南閤繕復之至三年七月此殿又災帝問高堂隆此何咎也於禮寧有祈禳之義乎對曰夫災變之發皆所以明教誡也惟率禮脩德可以勝之易傳曰上不儉下不節孽火燒其室又曰君高其臺天火為災此人君苟飾宮室不知百姓空竭故天應之以旱火從高殿起也按舊占曰災火之發皆以臺榭宮室為誡今宜罷散作役務從節約清掃所災之處不敢於此有所營造萑蒲

上所

甲反下音甫

嘉禾必生此地以報陛下虔恭之德帝不從遂

復崇華殿改曰九龍以郡國前後言龍見者九故以為名多棄法度疲衆逞欲以妾為妻之應也

吳孫亮建興元年十二月武昌端門災改作端門又災內殿門者號令所出殿者聽政之所時諸葛恪執政矜慢放肆孫峻總禁旅險害終著恪喪衆殄人峻授政於綝綝廢亮也 太平元年二月朔建業火時孫綝執政矯詔殺呂據滕允明年又殺朱異棄法律逐功臣之罰也 孫休永安五年二月城西門北樓災 六年十月

石頭小城火時嬖人張布專國多行無禮 孫皓建衡二年三月大火燒萬家死者七百人時皓制令詭暴棄法度誅名士後宮女謁盛行

晉武帝太康八年三月乙丑震災西閣楚王所止坊及臨商觀牕 十年四月癸丑崇賢殿災十月庚辰含章

鞠室脩成堂前廡景坊東屋暉章殿南閣火時有上書

曰漢王氏五侯兄弟迭任今楊氏三公並在大位故天

變屢見竊為陛下憂之由是楊珧音遙求退是時帝納馮

統都敢反之間廢張華之功聽楊駿之讒離衛瓘之寵此

逐功臣之罰也明年宮車晏駕其後楚王承竊發之旨
戮害二公身亦不免震災其坊又天意乎 惠帝元康

五年閏月庚寅武庫火張華疑有亂先命固守然後救

火是以累代異寶王莽頭孔子履

其逆反

漢高祖斷白蛇

劍及二百萬人器械一時蕩盡是後愍懷見殺殺太子

之罰也天戒若曰冢嗣將傾社稷將泯禁兵無所復施

皇旅又將誰衛帝后不悟終喪四海 八年十一月高

原陵火時賈后凶恣賈謐專朝惡罪宜見誅絕之應

永興二年七月甲午尚書諸曹火起延崇禮閣及閣道
夫百揆主化之本王者棄法律之應也後清河王暉入
嗣不終於位又殺太子之罰也 孝懷帝永嘉四年十

一月襄陽火燒死者三千餘人時王如自號大將軍司
雍二州牧衆四五萬攻略郡縣此下陵上陽失其節之
應也 元帝太興中王敦鎮武昌武昌災火起興衆救
之於此而發於彼東西南北數十處俱應數日不絕舊

說所謂濫災妄起雖興師衆不能救之之謂也干寶以
為此臣而君行亢陽失節是為王敦陵上有無君之心
故災也 永昌二年正月癸巳京都大火三月饒安東
先安陵三縣火燒七千餘家死者萬五千人 明帝太
寧元年正月京都火是時王敦威侮朝廷多行無禮內
外臣下咸懷怨毒極陰生陽也 成帝咸和二年五月
京師火 康帝建元元年七月庚申吳郡災 穆帝永
和五年六月震災石季龍太武殿及兩廟端門震災月

餘乃滅金石皆盡其後季龍死大亂遂滅亡 海西公
太和中郃愔為會稽太守六月大旱災火燒數千家延
及山陰倉米數百萬斛炎煙蔽天不可撲滅此亦桓溫
強盛將廢海西極陰生陽之應也 孝武帝寧康元年
三月京都風火大起是時桓溫入朝志在陵上少主踐
位人懷憂恐此與太寧火事同 太元十年正月國子
學生因風放火焚房百餘間是後考課不厲賞黜無章
蓋有育才之名而無收賢之實此不哲之罰先兆也

十三年十二月乙未延賢堂災是月丙申螽斯則百堂

及客館驃騎府庫皆火於時朝多弊政衰陵日兆不哲

之罰皆有象類主相不悟終至亂亡會稽王道子寵幸

尼及姁

武酣反
老女稱

母各樹用其親戚乃至出入宮掖禮見

人主天戒若曰登延賢堂及客館者多非其人故災之

也又孝武帝更不立皇后寵幸微賤張夫人夫人驕妬

皇子不繁垂螽斯則百之道故災其殿焉道子復賞賜

不節故府庫被災斯亦其罰也安帝隆安二年三月

龍舟二乘災是水沴火也其後桓玄篡位帝乃播越天
戒若曰王者流遷不復御龍舟故災之耳 元興元年
八月庚子尚書下舍曹火時桓玄遙錄尚書故天火示
不復居也 三年盧循攻略廣州刺史吳隱之閉城固
守其十月壬戌夜火起時百姓避寇盈滿城內隱之懼
有應賊者但務嚴兵不先救火由是府舍焚蕩燒死者
萬餘人因遂散潰悉為賊擒 義熙四年七月丁酉尚
書殿中吏部曹火 九年京都大火燒數千家 十一

年京都所在大行火災吳界尤甚火防甚峻猶日不絕
王弘時為吳郡晝在聽事見天上有一赤物下狀如信
幡遙集路南人家屋上火即大發弘知天為之災故不
罪火主此帝室衰微之應也

宋文帝元嘉五年正月戊子都下大火 七年十二月
都下火延燒大社社牆 二十九年三月壬午都下火
齊東昏侯永元二年七月甲申宮內火惟東閣內明帝
舊殿數區及太極殿以南得存餘皆蕩盡

梁武帝天監元年五月有盜入南北掖燒神武門總章
觀時帝初即位而火燒觀闕不祥之甚既而太子薨皇
孫不得立及帝暮年惑於朱异之口果有侯景之亂宮
室多被焚燒天誠所以先見也 普通二年五月琬琰
殿火延燒後宮三千餘間 中大通元年朱雀航華表
災明年同泰寺災大同三年朱雀門災水沴火也時帝
崇尚佛道宗廟牺牲皆以麋代之又數詣寺捨身為奴
王公以下贖之天變數見而不悟後卒以亡

陳武帝永定三年重雲殿災

東魏孝靜天平二年十一月閭闔門災是時齊神武作
宰而大野拔斬樊子鵠以州來降神武聽讒而殺之司
空元暉免逐功臣大臣之罰也 武定五年八月廣宗
郡火燒數千家

後齊後主天統三年九龍殿災延燒西廊 四年昭陽
宣光瑤華三殿災延燒龍舟是時讒言任用正士道消
祖孝徵作歌謠斛律明月以誅死讒夫昌邪勝正之應

也京房易傳曰君不思道厥妖火燒宮

隋文帝開皇十四年將祠泰山令使者致石象神祠之所未至數里野火歛起燒像碎如小塊時帝頗信讒言猜阻骨肉滕王瓚失志而死創業功臣多被夷滅故天見變而帝不悟其後太子勇竟被廢戮煬帝大業十二年顯陽門災舊名廣陽則帝之姓名國門之崇顯號令之所由出也時帝不遵法度驕奢荒怠信讒害忠天意若曰害廣陽也

唐太宗貞觀四年正月癸巳武德殿北院火 二十三

年三月甲午庫火 高宗永徽五年十二月乙巳尚書

司勳庫火 顯慶元年九月戊辰恩州吉州火焚倉廩

甲仗民居二百餘家十一月己巳饒州火 武太后證

聖元年正月丙申夜明堂火武太后欲避正殿徹樂宰

相姚璩以為火因人非天災也不宜貶損后乃御端門

觀酺引建章故事復作明堂以厭之是歲內庫災燔二

百餘區 萬歲通天元年三月壬寅撫州火 久視元

年八月壬子平州火燔千餘家 中宗景龍二年二月

東都凌空觀災 玄宗開元五年十一月乙卯定陵寢

殿火是歲洪州潭州災延燒州署州人見有物赤而燬
燬飛來旋即火發 十五年七月甲戌興教門樓柱災

是年衡州災延燒三百餘家州人見有物大如甕赤如
燭籠所至火即發 十八年二月丙寅大雨雪俄而雷

震左飛龍殿災占曰天火燒殿兵大起十月乙丑東都
宮佛光寺火 天寶二載六月東都應天門觀災延燒

左右延福門經日不滅京房易傳曰君不思道天火燔其宮室九載三月華嶽廟災時帝將封西嶽以廟災乃止十載八月丙辰武庫災燔兵器四十餘萬武庫甲兵之本也肅宗寶應元年十二月己酉太府左藏庫火代宗廣德元年十二月辛卯夜鄂州大風火發江中焚舟三十艘延及岸上民居二千餘家死者數千人
大歷十年二月莊嚴寺浮圖災初有疾風震電俄而火從浮圖中出德宗貞元元年江陵度支院火焚

江東租賦百餘萬 十三年正月東都尚書省火 十九年四月家令寺火 憲宗元和二年七月洪州火燔

民舍萬七千家 七年六月鎮州甲仗庫災主吏坐死者百餘人 八年江陵大火 十一年十一月甲戌元

陵火李師道起宮室於鄆州將謀亂既成而火 文宗

太和二年十一月甲辰禁中昭德寺火延至宣政東垣及門下省宮人死者數百人 三年十月癸丑仗內火

四年三月陳州許州火燒萬餘家十月浙西火 八

年三月揚州火皆燔民舍千區五月己巳飛龍駒中廢
火十月揚州市火燔民舍數千區十二月禁中昭成寺
火 開成二年六月徐州火延燒居民三百餘家 四
年十二月乙卯乾陵火丁丑晦揚州市火燔民舍數千
家 武宗會昌元年五月潞州市火 三年六月西內
神龍寺火萬年縣東市火焚廬舍甚衆 六年八月葬
武宗辛未靈駕次三原縣夜大風行宮幔城火 僖宗
乾符四年十月東都聖善寺火 昭宗大順二年六月

乙酉幽州市樓災延及數百步七月癸丑甲夜汴州相
國寺佛閣災是日暮微雨震電或見有赤塊轉門譙藤
網中周而火作頃之赤塊吐飛轉佛閣藤網中亦周而
火作既而大雨暴至平地水深數尺火益甚延及民居
三日不滅

後唐明帝天成四年十一月汝州火燒羽林軍營五百

餘間

先是司天奏熒惑入羽林
請京師為火備至是應之

長興二年四月汴州

封禪寺門上忽有火起延燒近寺廬舍相次黎陽縣亦

火

後晉高祖天福三年十一月襄州奏火焚居民千餘家
周世宗顯德五年四月吳越王錢弘俶奏十日夜杭州
火焚燒府署殆盡上命中使齎詔恤問

宋太祖建隆元年宿州火燔民舍萬餘區 二年三月
內酒坊火燔舍百八十區酒工死者三十餘 三年正
月滑州甲仗庫火燔儀門及軍資庫一百九十區兵器
錢帛並盡開封府通許鎮民家火燔廬舍三百四十餘

區二月安州牙吏施延業家火燔民舍并顯義軍營共
六百餘區五月京師相國寺火燔舍百餘區海州火燔
數百家死者十八人 乾德四年二月岳州衙署廩庫
火燔市肆民舍殆盡官吏踰城僅免 三年陳州火燔
民舍數千區潭州火燔民舍五百區踰月民死者三十
六人是春諸州言火者甚衆八月衡州火燔公署倉庫
民舍僅存者千餘區 五年京師建隆觀火 開寶二
年八月辰州解火及燔軍資庫 五年七月忠州解火

倉庫殆盡 七年九月亳州永城縣火燔民舍一千八十四區 八年四月洋州火燔州廨民舍千七百區亳州永城縣火燔軍營民舍千九百八十區死者九人

太宗太平興國七年八月益州西倉災 雍熙元年五月丁丑乾元文明二殿災初夕陰雲雷震火起月華門朔日辰巳方止 二年九月庚戌夜楚王元佐宮火燔舍數百區王自是以疾廢於家 端拱元年二月雲安軍威棹營火 二年三月衡州火燔州縣官舍倉庫軍

營三百餘區又崇賢坊有烏銜火燔數十處七日不滅

淳化三年十月蔡州懷愛軍營火燔汝河橋民居官

舍三千餘區死者數人十二月建安軍城西火燔民舍

官廨等殆盡四年二月永州保安津舍火飛燄過江

燒州門及民屋三百餘家真宗咸平二年四月池州

倉火燔米八萬七千斛景德元年正月平虜軍營火

焚居民廬舍甚衆四年十一月郢州火倉庫並盡

大中祥符元年正月桂州甲仗庫災二年四月昇州

火燔軍營民舍殆盡 七年雄州甲仗庫火 八年二

月甲寅宗正寺火四月壬申夜禁王元儼宮火自三鼓

北風甚癸酉亭午乃止延燔承天祥符門內藏左藏庫

朝元門崇文院祕閣天書法物內香藥庫 九年五月

甲子左天廡坊草場火 天禧二年二月戊寅北宅蔡

州團練使德雍院火延燔數百區 三年春京師多火

六月永州軍營火延民舍數百區 仁宗天聖七年六

月丁未王清昭應宮災初大中祥符元年詔建宮以藏

天書七年宮始成凡三千六百一十楹至是火發夜中大雷雨至曉而盡 明道元年八月壬戌脩文德殿成

是夜中火延燔崇德長春滋福會慶延慶崇徽天和承明八殿 景祐三年七月庚子太平興國寺火起閣中延燔開先殿及寺舍數百楹是夕大雨電 寶元三年

六月丁丑益州火焚民廬舍三千餘區 康定元年六

月乙未南京鴻慶宮神御殿火 慶厯三年十一月丙

寅上清宮火 八年正月壬午江寧府火初李景在江

南大建宮室府事其制多倣帝室至是一夕而焚惟存一廳乃玉燭殿也 至和二年并州太宗神御殿火

嘉祐三年正月溫州火燔屋萬四千間死者五十人

神宗治平四年十二月壬子夜睦親宮火焚九百餘間

甲寅廣親宮又火 熙寧六年二月丙申永昌陵上宮

火燔東城門 七年九月壬子三司火自巳至戌焚屋

千八十楹案牘殆盡 十年正月仙韶院火撤屋二百

五十楹三月丙子開封府火 元豐元年八月邕州火

焚官舍千三百四十六區諸軍衣萬餘襲穀帛軍器百五十萬 四年六月衡州火燒官舍民居七千二百楹

又欽州亦大雷震火焚城屋 五年二月洞真宮火

八年二月辛巳開寶寺火時寓禮部貢院於寺點檢試卷官翟曼陳方馬希孟焚死吏卒死者十四人 哲宗

元祐元年三月宗室宮院火 六年十二月開封府火

紹聖三年三月初七日尚書省火尋撲滅上諭執政

禁中屢火方醺禳已罷春宴仍不御垂拱殿三日 四

年七月甲子禁中火 元符元年四月宗室宮院火

徽宗建中靖國元年六月壬寅集禧觀火大雨中久而

後滅 崇寧二年六月太一宮火 三年三月辛丑大

內火 政和三年四月蘇州火延燒公私屋一百七十

餘間五月辛丑京師大盈倉火是歲成都府大慈寺溫

州純州皆火 八年九月掖庭大火自甲夜達曉大雨

如傾火益熾凡焚五千餘間後苑廣聖宮及宮人所居

幾盡焚死者甚衆 欽宗靖康元年十二月丙子夜尚

書省火延燒禮祠工刑吏部拆尚書省牌擲火中襍之

乃息 二年三月戊戌天漢橋火焚百餘家頃之都亭

驛又火已酉保康門火 高宗紹興元年十月乙酉行

在越州大火民多露處

令有司賑給粟
弛材葦之征

十二月辛未越

州再火吏部文書多焚乙酉降旨移蹕錢塘 二年正

月丁巳宣州大火燔城中民舍幾盡五月庚辰行在臨

安府大火頃刻跨山亘六七里燔民舍一萬數千家十

二月甲午行都大火燔吏刑工部御史臺官府民廬軍

壘盡乙未旦乃熄銓選文書無存者

令戶部發廩賑焚室

三年

九月庚申行都關門外民廬火燔者甚廣

令戶部發廩以賑命有司

脩火政

四年正月戊寅行都火燔闐閭民廬數千家

六年二月行都屢火通燔千餘家

詔沿流州縣幾執姦問者以李光言而止

十二月行都大火燔民廬萬餘家人有灼死者時上以

劉豫入寇親征都民之暴露者多凍死

令留守秦檜發戶部米以賑

七年二月丁酉太平州大火州治宣撫司及官舍民

廬帑藏文書皆盡民之死於火者甚衆錄事參軍呂應

中死其職當塗縣丞李致虛亦死焉 九年二月己卯

行都火七月壬寅復火 十年十月行都火燔民廬官

舍延及省部十一月丁巳溫州大火燔州學酤征舶等

務永嘉縣治及民廬千餘家 十一年七月婺州大火

燔郡獄倉塲務寺觀甚廣民廬幾燬其半九月甲寅建

康府火燔府治三千餘區民廬三千餘家 十二年三

月丙申行都火二月辛巳鎮江府火燔倉米數萬石芻

六萬東民居之焚者尤衆是月太平池州及蕪湖縣火

皆燔民廬四月庚辰行都火九月甲子行都民居火經

夕漸近太室而滅

乙丑令有司撤火道周廟垣二十步

十七年十二月

辛亥靜江府火燔民舍甚衆二十年正月壬午行都

火燔吏部文書皆盡二十六年潭州南岳廟火

即請復作

廟令有司給以緡粟二十九年四月鎮江府火焚軍壘民廬

令有

司子財賑粟乾道元年春德安府應城縣廩驛火二年

冬真州六合縣武鋒軍壘火十二月婺州火自是火患

不息人火之也九年九月台州火經夕至於翌日晝

漏半燔郡獄縣治醞務及民廬七千餘家 淳熙元年

十二月丁巳泉州火燔城樓民舍五十餘家

令有司賑恤

二年六月戊午潭州南岳廟火

令有司給錢萬五千緡粟三千斛改作

八

月嚴州火

令守臣恤之

十一月癸亥麗正門內東廡災是歲

瀘州火

郡上焚室之書不實部刺史張之俱坐貶秩

三年九月大內射殿

災延及東宮門 四年十一月辛酉鄂州南市火暴風

通夕燔民舍千餘家

令漕臣郡守賑恤之

五年四月庚寅興州

沙市火燔民舍三百四十餘家人有焚死者十一月和

州牧營火燔一百六十區

禁旅審上者居之也

七年二月江陵

府沙市大火燔民舍數千家江艦焚溺不可勝計灼死

者甚衆八月温州試士丁酉火作於貢闈

上令籍元卷姓名再試防

其溢於外貫也

八年正月揚州火

九年九月合州大火燔

民居幾盡官舍僅有存者十二年八月温州火燔城

樓居民廬四百餘家十月鄂州大火燔民居萬餘家江

風暴作結廬於隄泊艦於岸者焚溺無遺

今守臣恤之且止民毋隄

居

十四年五月大內武庫火戎器不害六月庚寅行

都寶蓮山民居火延七百餘家掠焚將校有死者

臣令守以

緡粟賑之

五月成都府市火燔民舍萬家

令帥臣賑恤之

十六年

九月南劍州大火民居存者無幾 光宗紹熙元年八

月壬寅處州火延州市及民舍數百家 二年四月行

都傳法寺火延及民廬言者以戚里土木為孽火數起

之應時中宮建廟第都民之應徙者多是月徽州大火

自庚子至於壬寅夜燔州治樵樓官舍郡獄緡帑庫務

凡十九所五百二十餘區延戶廬一千五百家

令部使者賑之

粟

五月己巳金州火燔州治官舍帑藏保勝軍器庫城

內外民舍甚廣

令總鎮及常平使者賑之

三年正月己巳行都火

通夕至於庚午闕閭焚者半十一月又火燔民居五百

餘家十二月甲辰鄂州火至於乙巳燔民居八百家市

井樓帝無存者 寧宗慶元二年八月己酉永州州市

火燔民廬三百家

皆令守臣賑恤之

三年五月甲申金州都

統司中軍壘舍火焚一千三百餘區閏六月乙酉又火

燔二千餘區

令予緡錢營其壘

六年八月戊戌徽州火燔民

舍八百餘家延郡獄官舍甚廣

令守臣賑恤之

嘉泰元年三

月戊寅行都大火至於四月辛巳燔御史臺司農寺將

作軍器監進奏文思御輦院太史局軍頭皇城司法物

庫御厨班直諸軍壘及民居五萬八千九十七家城內

外亘十餘里灼死之可知者五十有九人而踐死者不

可計都城九燬其七時百官皆僦舟以居

是夕火作於寶蓮山御史

臺胥楊浩居舍諫議大夫程松請戮浩以謝都民再疏始黜萬安軍猶免決

自是都民譌自

相驚亡賴因以縱火為姦利

壬午上降次貶食下哀痛之詔內出帑錢一十六萬

三千五百七十餘緡米六萬
五千一百九十餘石賑焚室

三年正月丁酉襄陽府

火作而風暴僅燔民舍六十家

選鋒軍校于友直死於
救焚帥漕臣上其功贈

二秩官
其二子

十一月甲午福州火民舍之焚者四百餘家

四年三月丁卯行都大火燔尚書省中書省樞密院六

部右丞相府制勅糧料院親兵營脩內司延及學士院

內酒庫內宮門廡夜召禁旅入撲太室撤廟廡神主移

御壽慈宮冊寶隨之戊辰旦火及和寧門鵠禁卒張隆

飛梯斧鵠門以下不火是夕火分數道燎民廬三千七

十餘家

詔出內帑絳錢
豐儲倉米以賑

己巳神主回御太室時省部皆

寓治驛寺

壬申上避路朝下罪已詔乙
亥令百官直言時政闕失

六月盱眙軍天

長縣禁旅戍壘火鎧械為盡八月壬辰鄂州外南市火

燔民舍五百餘家 開禧二年二月癸丑壽宮火

乙卯
上降

次去
樂

四月壬子行都火燔民居數百家

詔出封樁絳錢
豐儲倉粟以賑

嘉定二年八月己巳信州火燔民廬二百家九月丁

酉吉州火燔五百餘家是歲瀘州火延及民廬一千餘

家

皆令郡
賑恤之

四年閏二月己卯紹興府嵊縣浦橋火燔

百餘家三月滁州火燔民居甚廣

皆今各郡賑恤之

十月撫州

火辛卯福州一夕再火燔城門僧寺民廬千餘家死者

數人 五年五月己未和州火燔民廬二千家 八年

八月辛丑湖州火燔寺觀及民廬三百家 九年七月

甲戌南劔州沙縣火燔縣門官舍及民廬一千一百餘

家有死者

令各郡賑恤之

十一年二月行都火燔民居數百

家九月己巳禁垣外萬松嶺民舍火延及四百八十餘

家

令出緡粟賑之

十二年二月庚寅安豐軍故步鎮火燔民

廬千餘家死傷於焚者五十餘人

令郡守賑恤之

八月庚午慶

元府火燔官舍民廬第宅寺觀甚衆

詔縣焚室而弛其年租賦

十一

月壬子行都火燔城內民廬數萬家禁壘百二十區

軍賑

民緡粟令臨安府帥臣安集焚徙者且弛財葦之征

十七年四月丁卯西和州

焚軍壘及繞城民廬二千餘家人火之也

守臣尚震午聞金焚之而

適金實不至

六月丁亥岳州火燔岳陽樓郡獄帑庫以及民

居八十家已丑又火燔百餘家

火異

周武王伐紂師渡孟津既濟有火自上復於下至於王屋流為烏其色赤其聲魄云

註見羽蟲之異

威烈王三年冬

十一月晉有火下於北方有聲如鼓

漢成帝河平四年六月山陽火生石中改元為陽朔

朔始

也以火生石中

言陽氣之始

後漢桓帝延熹九年三月癸巳京師有火光轉行人相驚譟

晉惠帝永康元年帝納后羊氏將入宮衣中忽有火衆

咸怪之後后竟坐廢 光熙元年五月范陽國地燃可
以爨 穆帝升平元年涼州城東池中有火姑臧澤水
中有火

石虎時石燃於泰山八日而滅 苻堅時關中土燃
無火而煙氣大起方數十里中月餘不滅

齊武帝永明十一年先是魏地謠言赤火南流喪南國
是歲有沙門從北齋此火至火赤於常火而微云以療
疾貴賤爭取之多得其驗二十餘日都下大盛咸云聖

火詔禁之不止火灸至七炷而疾愈吳興丘國賓密以還鄉邑人楊道慶虛疾二十年依法灸即差

唐太宗貞觀十三年三月壬寅雲陽石燃方丈晝則如灰夜則有光投草木則焚歷年乃止火失其性而沴金也幽州坊谷地常有火長慶三年夏遂積水為池近水沴火也

宋太祖開寶七年六月棣州有火自空墜於城北有物

如龍

詳見龍蛇之異

太宗端拱元年瀘州鹽井竭遣工入視

忽有聲如雷火焰突出工被傷 高宗紹興三十二年
建昌軍新城縣有巨室篋中時有火光燔衣帛過半而
篋不焚近孽火也

赤青赤祥

左氏傳魯襄公時宋有生女子赤而毛棄之隄下宋平
公母共姬之御者見而收之因名曰棄長而美好納之
平公生子曰佐後宋臣伊戾讒太子痤而殺之先是大
夫華元出奔晉華弱奔魯華臣奔陳華合比奔衛劉向

以為時則火災赤眚之明應也京房易傳曰尊卑不別厥妖女生赤毛

漢惠帝二年天雨血於宜陽一頃所劉向以為赤眚也

時諸呂用事讒口妄行殺三皇子

高帝三子建立非嗣立後宮子

為惠帝嗣

及呂太后崩大臣共誅滅諸呂僵尸流血京房易

傳曰歸獄不解茲謂追非厥咎天雨血茲謂不親民有怨心不出三年無其宗人又曰佞人祿功臣僂天雨血

武帝建元四年有風赤如血 哀帝建平四年四月

山陽湖陵雨血廣三尺長五尺大者如錢小者如麻子
後二年帝崩王莽擅朝誅貴戚丁傅大臣董賢等皆放
徙遠方與諸呂同象誅死者少雨血亦少

王莽始建國四年夏赤氣出東南竟天

後漢桓帝建和三年秋七月址地廉雨肉似羊肋

肋脅骨也

或大如手近赤祥也時梁太后攝政兄冀專權枉殺李
固杜喬等天下冤之其後梁氏誅滅

魏公孫淵時襄平址市生肉長圍各數尺有頭目口喙

無手足而動搖此赤祥也占曰有形成有體不聲其國滅亡淵尋為魏所誅

吳成將鄧喜殺猪祠神治畢懸之忽見一人頭往食肉

喜引弓射中之咋咋

助陌反

作聲繞屋三日近赤祥也後

人白喜謀北叛闔室受誅京房易妖曰山見葆江於邑邑有兵狀如人頭赤色

晉武帝太康五年四月壬子魯國池水變赤如血 十

年十月河陰有赤雪三頃此赤祥也是後四載而帝崩

王室遂亂 惠帝元康五年三月呂縣有流血東西百

餘步此赤祥也至元康末窮凶極亂僵尸流血之應也

干寶以為後八載而封雲亂徐州殺傷數萬人是其應也 永康元年三月尉氏雨血夫政刑舒緩則有常燠

赤祥之妖此歲正月送愍懷太子幽於許宮天戒若曰

不宜緩恣姦人將使太子冤死惠帝愚眊不寤是月愍

懷遂斃於是王室成釁禍流天下淖

反奴故

齒殺齊湣

眉隕

反 占曰天雨血霑衣天以告也此之謂乎京房易傳曰

歸獄不解茲謂追非厥咎天雨血茲謂不親下有怨心
不出三年亡其宗人又曰佞人祿功臣戮天雨血也

永寧二年十一月壬寅夜赤氣竟天隱隱有聲永興
二年十月赤氣見於北方東西竟天愍帝建興元年
河東雨肉

劉聰偽建興元年雨血於東宮延明殿徹瓦在地者
深五寸又雨血平陽廣袤十里平陽地震其崇明觀
陷為池水赤如血赤氣至天有赤龍奮迅而去流星

起於牽牛入紫微龍形委蛇其光照地落於平陽址
十里視之則肉臭聞於平陽長三十步廣二十七步
肉傍常有哭聲晝夜不止數日聰后劉氏產一蛇一
獸各害人而走尋之不得頃之見於隕肉之傍時聰
納劉殷三女為后逆骨肉之綱亂人倫之則隕肉諸
妖其青亦大俄而劉氏死哭聲自絕

石虎末雨血周遍鄴城

梁武帝天監十五年七月荆州市殺人而身不僵首墮

於地動口張目血如竹箭直上丈餘然後如雨細下是
歲荊州大旱近赤祥寃氣之應

陳宣帝大建十四年正月御座幄下見一物如車輪色
正赤尋而帝患無故大呼數聲而崩 後主至德二年
十二月有赤物隕於太極殿前初下鐘皆鳴又嘗進白
飲忽變為血又有血霑殿階漑漑然至御榻俄而國亡
北齊武成河清二年太原雨血劉向曰血者陰之精傷
害之象僵屍之類明年周師與突厥入并州大戰城西

伏尸百餘里京房易飛候曰天雨血染衣國亡君戮亦
後主亡國之應 四年有物隕於殿庭色赤形如赤漆
鼓帶小鈴衆星隨者如小鈴四月婁太后崩 武平中
有血點地自咸陽王斛律明月宅而至於太廟天戒若
曰殺明月則宗廟隨而覆矣後主不悟國祚竟絕

隋煬帝大業十三年上徙居丹陽將遜居江左有石自
江浮入於揚子日光四散如血上甚惡之次年遇弑

唐高祖武德七年河間王孝恭征輔公柘宴羣師於舟

之血公祜授首之祥 武德初突厥國中雨血三日

武太后光宅初宗室岐州刺史崇真之子橫杭等夜宴忽有氣如血腥 武后時來俊臣家井水變赤如血井

中夜有吁嗟嘆惋聲俊臣以木棧之木忽自投十步外

長安中井水晉祠水赤如血 中宗時成王千里家有

血點地及奩箱上有血淋瀝腥聞數步又中郎將東夷

人毛婆羅炊飯一夕化為血 中宗景龍二年七月癸

已赤氣際天光燭地三日乃止赤氣血祥也 玄宗天

寶六載少陵原楊慎矜父墓封域內草木皆流血慎矜
令浮屠史敬思禳之退朝裸而桎梏於叢棘間如是數
旬流血不止 十二載李林甫第東北隅每夜火光起
或有如小兒持火出入者近赤祥也 十三載汝南葉
縣南有土塊園中有血出數日不止 肅宗寶應元年

八月庚午夜有赤光亘天貫紫微漸移東北彌漫半天
代宗大曆十三年二月太僕寺有泥像左臂上有黑

汗滴下以紙承之血也 德宗貞元二年十一月壬午

日沒有赤氣五出於黑雲中亘天 十二年九月癸卯

夜有赤氣如火見北方上至北斗 十七年福州劍池

水赤如血 二十一年正月甲戌雨赤雪於京師 憲

宗元和十四年二月鄆州從事院門前地有血方尺餘

色甚鮮赤不知所從來以為自空而墮也 穆宗長慶

元年七月戊午河水赤三日止 敬宗寶曆元年十二

月乙酉夜西北有霧起須臾遍天霧止有赤氣或淺或

深久而乃散 文宗太和元年四月庚戌北方有赤氣
中有數白氣間之六月乙卯夜西北有赤氣八月癸卯
京師見赤氣滿天 二年閏三月乙卯北方有赤氣如
血 懿宗咸通七年鄭州永福湖水赤如凝血者三日
僖宗乾符六年中書政事堂忽有死人血污滿地
不知主名又御井水色赤而腥臊之得一死女子腐爛
近赤祥也 中和二年七月丙午夜西北方赤氣如絳
際天 光啓元年正月潤州江水赤凡數日

宋神宗熙寧二年十一月每夕有赤氣見西北隅如火

至人定乃滅 哲宗元祐三年七月丁卯夜東北方明

如晝俄成赤氣內有白氣經天 徽宗建中靖國元年

正月朔夕有赤氣起東北彌亘西方久之中出白氣二

及赤氣將散復有黑氣在其傍 欽宗靖康元年九月

戊寅有赤氣隨日出 高宗建炎元年八月庚午東北

方有赤氣占曰血祥是歲金人再犯京師遂南牧兵禍

拏結流血之象也 四年五月洞庭湖夜赤光見東北

亘天如火明照湖心上一色俄轉東南此赤祥也後
金人犯湘沔又鍾相孔彥舟曹火星劉超彭筠楊公巨
盜相繼荼毒一道即其驗也 紹興七年正月乙酉北
方有赤氣達旦辛卯東北有赤氣如火在牛斗間十一
月癸卯南方有赤氣東西北皆赤雲自日入至於甲夜
皆赤祥也 八年九月甲申赤氣出紫微垣 十八年
八月丁亥九月甲寅皆有赤氣如火 二十年十一月
建昌軍新城縣永安村風雪大作夜半若數百千人行

聲語笑歌哭雜擾匆遽而凝寒陰黑咫尺莫辨窺之無
所睹明旦雪深有人畜鳥獸跡流血污染十餘里入山
乃絕近血妖亦赤祥也 二十七年三月乙酉赤氣出
紫微垣七月壬申赤氣隨日入 三十年二月壬申皆
有赤氣如火 三十二年春淮水溢中有赤氣如凝血
先是時金主完顏亮入寇駐揚州為其下所弑至是始
遁淮水凝血逆氣之應也鄭景純曰血水類同屬於坎
後連歲旱亦其驗也 孝宗隆興二年十一月庚寅日

入後赤雲隨之 乾道元年八月壬午赤氣中天自日

入至於甲夜 六年十月庚午赤氣隨日出十一月丁

丑赤雲隨日入至於甲夜 七年七月壬寅十月戊午

己未八年十月乙巳丙午淳熙三年八月丁酉戊戌皆

有赤氣隨日入出 十三年行都民舍有血自地中出

濺屋梁汙人衣近赤祥也 十四年十一月癸丑甲寅

有赤氣隨日入出 光宗紹熙三年春潼川路久旱日


月星皆帶赤氣 四年十一月甲戌赤雲夜見白雲間

之近赤白祥也

寧宗慶元六年十月赤氣夜發橫天

嘉泰四年二月庚申夜有赤雲間以白氣東北亘天
後八日國有大火言者以為火祥 嘉定六年十月乙
卯赤氣隨日出十一月辛卯赤氣隨日入

文獻通考卷二百九十八



總校官庶吉士臣張能照

校對官修撰臣張書勳

謄錄監生臣周志禮

欽定四庫全書叢要

史部

文獻通考卷

二百九十九
三百



欽定四庫全書薈要卷九千六百二十一

史部

文獻通考卷二百九十九

鄱陽馬端臨貴與著

物異考五

木異 華孽

殷大戊亳有祥桑穀共生

二木合而共生

傳曰俱生乎朝七日

而大拱

兩手合為拱

伊陟戒以修德而木枯劉向以為桑猶

喪也穀猶生也殺生之柄失而在下近草妖一曰野木

生朝而暴長小人將暴在大臣之位危亡國家象朝將虛之應也

春秋魯僖公三十三年十二月李梅實

詳見草異門

考王

十三年冬晉桃杏實 顯王元年冬桃華於秦

漢惠帝五年冬桃李華東實 呂后元年秋桃李華

文帝六年冬十月桃李華 昭帝時上林中大柳樹斷

仆地一朝起立生枝葉有蟲食其葉成文字曰公孫病

已立昌邑王國社有枯樹復生枝葉睦孟以為木陰類

下民象當有政廢之家公孫氏從民間受命為天子者
昭帝富於春秋霍光秉政以孟妖言誅之後昭帝崩無
子徵昌邑王賀嗣位狂亂失道光廢之更立衛太子之

孫是為宣帝宣帝本名病已京房易傳曰枯楊生稊

師古

曰大過九二爻辭也稊楊
秀之始生者音徒莫反

枯木復生人君亡子 元帝

初元四年皇后曾祖父濟南東平陵王伯墓門梓柱卒

生枝葉上出屋

孟康曰王伯莽之祖也師古曰莽高祖
父也故下云高祖考卒讀曰猝猝恭也

劉向以為王氏貴盛將代漢家之象也後王莽篡位自

說之曰初元四年莽生之歲也當漢九世火德之厄而有此祥興於高祖考之門門為開通梓猶子言王氏當有賢子開通祖統起於柱石大臣之位受命而王之符也 建昭五年兗州刺史浩賞禁民私所自立社

張晏曰民

問三月九月又社號曰私社臣瓚曰舊制二十五家為一社而民或十家五家共為田社是私社師古曰瓚說是山陽橐茅鄉社有大槐樹

師古曰橐縣名也屬山陽郡茅鄉橐縣之鄉也橐音

拓吏伐斷之其夜樹復立其故處 成帝永始元年二

月河南街郵檮樹生枝如人頭

師古曰郵謂行書之舍檮樹似椿檮音丑余反

椿音丑
倫反

眉目鬚皆具亡髮耳 哀帝建平三年十月汝

南西平遂陽鄉柱仆地生枝如人形

師古曰仆頓也音赴

身青黃

色面白頭有鬚髮稍長大凡長六寸一分京房易傳曰

王德衰下人將起則有木生為人狀 哀帝建平三年

零陵有樹僵地

師古曰僵偃也音疆

圍大六尺長十丈七尺民斷

其本長九尺餘枯三月樹卒自立故處

師古曰卒讀曰猝

京房

易傳曰棄正作淫厥妖木斷自屬

師古曰屬連續也音之欲反

天辟

惡之

如淳曰天辟謂天子也師古曰辟音璧

成帝建始四年秋桃李實

後漢安帝元初三年東平陸上言木連理

序例曰凡瑞應自和帝以

上政事多美近於有實故書見於某處自安帝以下王道衰缺容或虛飾故書某處上言也

延光

三年潁川言木連理

桓帝建和二年河東言木連理

延熹九年雒陽城局竹栢葉有傷者占曰天子凶

靈帝熹平三年右校別作中有兩栲樹皆高四尺所其

一株宿夕暴長長丈餘大一圍作胡人狀頭目鬚鬚髮

備具京房易傳曰王德衰下人將起則有木生人狀

臣昭

以木生人狀下人將起京房之占雖以證驗貌類胡人猶未辨了董卓之亂實擁胡兵僱汜之時充斥尤甚遂

窺問宮嬪剝虐百姓鮮卑之徒踐籍畿封胡之害深亦已毒矣

五年十月壬午御所居

殿後槐樹皆六七圍自拔倒樹根在上

臣昭曰槐是三公之象貴之也

靈帝授位不以德進貪愚是升清賢斯黜槐之倒植豈以斯乎

中平中長安城西北

六七里空樹中有人面生鬚

魏志曰建安二十五年正月曹公在雒陽起建始殿

伐濯龍樹而血出又掘徙梨根傷而血出曹公惡之遂寢疾是月薨

獻帝興平元年九

月桑復生椹可食

臣昭曰桑重生椹誠是木異必在濟民安知非瑞乎時蒼生死敗周秦殲

盡餓魂餒鬼不可勝言食此重椹大拯危命雖連理附枝亦不能及若以為怪則建武野穀旅生麻菽尤盛復是草妖邪

建安二十五年正月魏武帝在洛陽起建始殿

伐濯龍樹而血出又掘徙梨根傷亦血出帝惡之遂寢疾未幾崩

蜀後主景曜五年宮中大樹無故自折

魏文帝景初三年十月桃李華

吳孫亮建興元年九月桃李華

晉惠帝元康二年春巴西郡界竹生紫花結實如麥外

皮青中赤白味甘 元康九年六月庚子有桑生東宮

西廂日長尺餘甲辰枯死此與殷大戊同妖太子不能

悟故至廢戮也班固稱野木生朝而暴長小人將暴居大臣之位危國亡家之象朝將為墟也是後孫秀張林用事遂至大亂永康元年四月立皇孫臧為皇太孫五月甲子就東宮桑又生於西廂明年趙王倫篡位鴆殺臧此與愍懷同妖也是月壯武國有桑化為栢而張華遇害壯武華之封邑也孝懷帝永嘉二年冬項縣桑樹有聲如解材人謂之桑樹哭按劉向說桑者喪也又為哭聲不祥之甚是時京師虛弱胡寇交侵東海王

越無衛國之心四年冬季而南出五年春薨於此城石
勒邀其衆圍而射之王公以下至衆庶死者十餘萬人
又剖越棺焚其屍是敗也中原無所請命洛京亦尋覆
沒桑哭之應也 六年五月無錫縣有四株茱萸樹相

樛

居虬反

而生狀若連理先是郭景純筮延陵

蠲

於殄反字或作

魑音

偃

鼠遇臨之益曰後當復有妖樹生若瑞而非辛螫

音

釋

之木也倘有此東西數百里必有作逆者及此木生

其後徐馥果作亂亦草妖也郭又以為木不曲直其七

月豫章郡有樟

諸良反

樹久枯是日忽更榮茂與漢昌邑

枯社復生同占是懷愍淪陷之徵元帝中興之應也

元帝太興四年王敦在武昌鈴下儀仗生華如蓮華五
六日而萎落此木失其性干寶以為狂華生枯木又在
鈴閣之間言威儀之富榮華之盛皆如狂華之發不可
久也其後敦果以逆戮一說亦華孽也於易枯楊生華
明帝太寧元年九月會稽剡縣木生如人面是後王
敦稱兵作逆禍敗無成昔漢哀成之世並有此妖而人

貌備具故其禍亦大今此但如人面而已故其變也輕

矣 成帝咸和六年五月癸亥曲阿有柳樹枯倒六載

是日忽復起生至九年五月甲戌吳縣吳雄家有死榆

樹是日因風雨起生與漢上林斷柳起生同象初康帝

為吳王於時雖改封琅邪而猶食吳郡為邑是帝越正

體饗國之象也曲阿先亦吳地象見吳邑雄之舍又天

意乎 哀帝興寧三年五月癸卯廬陵西昌脩明家有

僵栗樹是日忽復起生時孝武年始四歲俄而哀帝崩

海西即位未幾而廢簡文越自藩王入纂大業登阼享國又不踰二年而孝武嗣統帝諱昌明識者竊謂西昌修明之祥帝諱實應焉是亦與漢宣帝同象也 海西

太和元年涼州楊樹生松天戒若曰松者不改柯易葉楊者柔脆之木今松生於楊豈非永久之業將集危亡之地邪是時張天錫稱雄於涼州尋而降苻堅 孝武太元十四年六月建寧郡銅樂縣枯樹斷折忽然自立相屬京房易傳曰棄正作淫厥妖木斷自屬妃后有專

木仆音赴反立是時正道多僻其後張夫人專寵及帝崩

兆庶歸咎張氏焉 安帝元興三年荆江二州界竹生

實如麥

劉曜時西明門內大樹風吹折經一宿樹忽變為人
形髮長一尺鬚眉生三寸皆黃白色有斂手之狀亦
有兩脚着裙之形惟無目鼻每夜有聲十日而生柯
條遂成大樹枝葉甚茂

石勒微時所居武鄉北原山上草木皆有鐵騎之象

家園中人參花葉甚茂悉成人狀父老及相者曰此胡狀貌奇異志度非常不可量也

宋孝武帝孝建元年芳香琴堂東西有雙橘連理改芳香堂為連理堂

魏太武太延元年魏郡野木連理

齊後主武平五年鄴城東青桐樹有如人狀京房易傳曰王德衰下人將起則有木生為人狀時後主怠於政事耽荒酒色大發徭役後二歲而亡木不曲直之效

七年宮中有樹大數圍夜半無故自拔齊以木德王無故自拔亡國之應其年齊亡

隋文帝開皇八年四月幽州人家以白楊木懸竈上積十餘年忽生三條皆長三尺餘甚鮮茂仁壽二年春蓋屋人以楊木為屋梁生三條長二尺京房易傳曰妃后有顓木仆反立斷枯復生獨孤后專恣之應也 仁壽元年十月蘭州楊樹上松生高三尺六節十二枝宋志曰松不改柯易葉楊者危脆之木此永久之業將集危

亡之地也是時帝惑讒言幽廢冢嫡初立晉王為皇太子天戒若曰皇太子不勝任永久之業將致危亡帝不悟及帝崩太子立是為煬帝竟以亡國 仁壽四年八月河間柳樹無故枯落既而花葉復生京房易飛候曰木再榮國有大喪是歲宮車晏駕

唐武德四年亳州老子祠有枯樹復生枝葉老子唐所祖也占曰枯木復生權臣執政睦孟以為有受命者九年三月順天門樓東柱已傾毀而自起占曰木仆而

自起國之災 貞觀十八年十月山南獻木連理交錯

玲瓏有同羅木一丈之幹并枝者二十餘所 二十年

正月玉華宮李樹連理隔澗合枝 顯慶四年八月有

毛桃樹生李李國姓也占曰木生異實主國殃 垂拱

四年三月雨桂子於台州旬餘乃止占曰天雨草木人

多死 長壽二年十月萬象神宮側檉杉皆變為栢栢

貫四時不改柯易葉有士君子之操檉杉柔脆小人性

也象小人居君子之位 延載元年九月內出梨花一

枝示宰相萬木搖落而生花陰陽黷也傳曰天反時為災又近常燠也景雲二年高祖故第有柿樹自天授

中枯死至是復生神龍二年十月陳州李有華鮮茂

如春開元二十一年蓬州枯楊生李枝有實與顯慶

毛桃生李同占二十九年亳州老子祠枯樹復榮大

歷九年晉州神山縣興唐觀枯檜復生興元元年春

亳州真源縣有李樹植已十四年其長丈有八尺至是

枝忽上聳高六尺周迴如蓋九尺餘李國姓也占曰木

生枝聳國有寇盜是歲中書省枯柳復榮 貞元四年

正月雨木於陳留十里許大如指長寸餘中空所下立
如植木生於下而自上隕者上下易位之象碎而中空
者小人象如植自立象 元和十一年十二月桃李華
十五年九月己酉大雨樹無風而摧者十五六近木
自拔也占曰木自拔國將亂 長慶二年七月幽州奏
當道有李樹兩根並生相去七寸連理去地二尺合為
一幹向上一體外分布枝葉高一丈三尺有實二百二

十一顆 長慶三年十一月成都栗樹結實食之如李
大和二年九月徐州滑州李有華實可食 三年成
都李樹有木瓜空中不實 會昌三年冬沁源桃李華
咸通十四年四月成都李實變為木瓜時人以為李
國姓也變者國奪於人之象 廣明元年冬桃李華山
華皆發 二年春眉州有檀樹已枯倒一夕復生 中
和二年九月太原諸山桃杏華有實

後唐同光二年三月唐州奏淮瀆廣潤王廟有兩樹東

西相去七尺五寸各出地七尺五寸兩樹相向連理畫
圖以進

晉開運二年十一月鄧州奏穰縣和平鄉竹合歡畫圖
進之

蜀王建永平二年劔州木連理

宋太平興國六年正月温州瑞安縣民張度解木五片
皆有天下太平字 雍熙二年八月刑部尚書宋琪家
牡丹生三華 淳化三年冬十月京師太平興國寺牡

丹生華占曰有喪是歲恭孝太子薨 至道二年秋九

月環慶州梨生華占曰有兵明年虜寇朔方 咸平元

年九月河南府鞏縣柴務牡丹華 六年修昭應宮有

木斷之文如點漆貫徹上下體若梵書八月召近臣觀

龍圖閣瑞木有文成字一有北斗七星形一有佛手形

一有蛇形十一月襄州民劉七言家生木有文如龍魚

鳳鶴之狀 七年五月撫州修天慶觀解木有文如墨

畫雲氣峰巒人物衣冠之狀焉七月綿州彰明縣崇仙

觀柱有文為道士形及北斗七星象 八月晉州慶唐

觀古栢中別生槐長丈餘又葛生栢中分條垂蔓下覆

九年舒州懷寧縣民家二柳相距三尺許其枝合如

一資州梅樹與青桐樹上合成連理太平軍紅橘連理

又黃橘附桑枝而生瑞聖園槐一株中分四枝上復合

為一眉州修天慶觀江中獲巨木數百 咸平二年三

月宣池歛杭越睦衢婺州箭竹生米如稻詳見穀異門 慶

歷六年九月甲辰登州有巨木浮海而出者三千餘

八年九月甲子潭州南岳南臺寺瑞應峰前一夕雷雨

平地湧木若龜首足具高二尺圍一丈 熙寧元年三

月簡州木連理是歲英州因雷震一山梓樹盡枯而為

龍腦價為之賤至京師一兩纔直錢一千四百 二年

建州民獲木龍

詳見龍蛇之孽

十年八月乙巳惠州言柚木

有文曰王帝萬天下太平 元豐元年五月劍州木連

理 三年六月己未饒州長山雨木子數畝狀類山芋

子味香而辛土人以為木子又曰菩提子明道中嘗有

之是歲大稔十二月唐州泌陽縣甘棠木連理 六年

五月亳州衛真縣洞霄宮枯槐生枝葉 元祐元年八

月己丑杭州民俞舉慶七世同居家園木連理 五年

四月德州言木連理 元符元年八月施州李木連理

二年九月眉州眉山縣檜木二株異根同幹本枝相

附 崇寧四年正月汝州襄城縣李梨木連理 大觀

元年三月湟州言爛木生葉八月端州永興軍並言木

連理 二年十月乙巳兗州龔丘縣檜生花如蓮實十

二月岢嵐軍園池生瑞木 政和二年七月玉華殿萬

年枝木連理是月乙酉南雄州言楓木連理十月安州
武義縣木根有萬宋年歲四字 四年建州言木連理

五年五月禁中芭蕉連理六月辰州沅陵縣江漲流
出楠木二十七條可為明堂梁柱蔡京等拜表賀九月
丙申徐州彭城縣栢開花十二月辛丑真定府言元氏
縣民王寘屋柱槐木再生枝葉約高四十餘尺是歲邵
州海棠木連理澤州台州槐木連理荆門軍紫薇木連

理 六年坊充洪明夔徐新全隰太平州並言木連理

梅州枯木生枝 宣和二年四月永州民劉思析薪兩

邊各有天下太平字 紹興十四年四月虔州民毀歌

屋析柱木理有字五其文曰天下太平時守臣薛弼上

之時土宇分裂南北塗炭不儷於事近木妖也或曰木

之生也在先朝盛時 二十年八月福州冲虛觀皂筴

木翠莢再實 二十一年池州建德縣定林寺桑生李

實栗生桃實占曰木生異實國主殃 二十五年十月

贛州獻太平木如虔時秦檜擅朝喜飾太平郡國多上
草木之妖以為瑞 二十七年四月徽州祁門縣圃桃

已實復華 隆興初漢陽軍有插柳枝於石罅者木無

根石無土而秀茂成陰歲有華實先是郡獄誣服孝婦
殺姑當刑祝髻上花以自明行刑者如其言而生此冤
氣之鍾於木而木反麗土之常者也 淳熙中興化軍

仙游縣九座山古杉木末生花氣如蘭 淳熙十六年

三月揚州桑生瓜櫻桃生茹此草木互為妖也七月晉

陵縣民析薪中有木字曰紹熙五年如是者二是時紹熙新元猶未頒也而紹熙紀號果止五年此近木妖也

紹熙四年臨安府富陽縣栗生檜實 五年十一月

辛亥行都雨木與唐志貞元陳留雨木同占木生於下而自上隕者將有上下易位之象越月吏部侍郎彭龜年上疏論知閣門事韓侂冑姦萌坐黜後侂冑擅朝嘉定六年五月己巳嚴州淳安遂安桐廬三縣大木自拔占曰木自拔國將亂

草異

春秋僖公三十三年十二月隕霜不殺草李梅實劉歆
以為草妖劉向以為今十月周十二月於易五為天位
君位九月陰至五通於天位其卦為剝剝落萬物始大
殺矣明陰從陽命臣受君令而後殺也今十月隕霜而
不能殺草此君誅不行舒緩之應也時公子遂專權三
桓始世官其後遂殺子赤三家逐昭公董仲舒指略同
京房易傳曰臣有緩茲謂不順厥異霜不殺也李梅當

剥落反實近草妖先華而後實不書華舉重者也陰成陽事象臣顓君作威福一曰冬當殺反生象驕臣當誅不行其罰也故冬華華者象臣邪謀有端而不成至於實則成矣一曰君舒緩其燠氣不藏則華實復生董仲舒以為李梅實臣下強也記曰不當華而華易大夫不當實而實易相室

師古曰相室猶言相國謂宰相也相室相王室

冬水王木相

故象大臣

漢元帝永光二年八月天雨草而葉相膠結大如彈丸

平帝元始元年正月天雨草狀如永光時京房易傳
曰君吝於祿信衰賢去厥妖天雨草

後漢安帝元初三年有瓜異本共生一瓜同蒂時以為
嘉瓜或以為瓜者外延離本而實女子外屬之象也是
時閻皇后初立後閻后與外親耿寶等共譖太子廢為
濟陰王更外迎濟北王子犢立之草妖也

古今註曰和
帝永元七年

三月江夏縣民舍柱生兩枝其一尺五
寸分八枝其一尺六寸分五枝皆青也

靈帝中平元

年夏東郡陳留濟陽長垣濟陰宛句離狐縣界

風俗通
曰西及

城皇陽武城郭路邊

有草生其莖靡纍腫大如手指狀似鳩雀龍

蛇鳥獸之形五色各如其狀毛羽頭目足翅皆具

風俗通曰

亦作人狀操持兵弩萬萬脩具非但彷彿類良熟然也

近草妖也是歲黃巾賊始

起皇后兄何進異父兄朱苗皆為將軍領兵後苗封濟

陽侯進苗遂秉威權持國柄漢遂微弱自此始焉

應劭曰闕

東義兵先起於宋衛之郊東郡太守喬瑁負眾怙亂陵蔑同盟忿嫉同類以殞厥命陳留濟陰迎助謂為離德棄好即戎吏民殲之草妖之興豈不信哉

吳孫亮五鳳元年六月交趾稗草化為稻昔三苗將亡

五穀變種此草妖也其後亮廢孫皓天璽元年吳郡臨平湖自漢末穢塞是時一夕忽開除無草長老相傳此湖塞天下亂此湖開天下平吳尋亡而九服為一

天紀三年八月建鄴有鬼目菜生工黃狗家依緣棗樹長丈餘莖廣四寸厚二分又有蕒菜生工吳平家高四尺如枇杷形上圓徑一尺八寸莖廣五寸兩邊生葉綠色東觀案圖名鬼目作芝草蕒菜作平慮遂以狗為侍芝郎平為平慮郎皆銀印青綬干寶曰明年平吳王濬

止船正得平渚姓名顯然指事之徵也黃狗者吳以土運承漢故初有黃龍之瑞及其季年而有鬼目之妖託黃狗之家黃稱不改而貴賤大殊天道精微之應也

容齋洪氏隨筆曰吳歸命侯天紀三年唐中宗景龍二年俱有苦蕒菜生之異說者以為草妖予按蕒菜即苦蕒今俗呼為苦蕒者是也天紀景龍之事甚相類歸命次年亡國中宗後一年遇害雖事非此致亦可謂妖矣平慮草不知何狀揚雄甘泉

賦并問註如淳曰并問其葉隨時政政平則平政不平則傾也顏師古曰如氏所說自是平慮耳然則亦異草也鬼目見爾雅郭璞云今江東有鬼目草莖似葛葉員而毛子如耳璫也赤色叢生廣志曰鬼目似梅南人以飲酒南方草木狀曰鬼目樹大者如木子小者如鴨子七月八月熟色黃味酸以蜜煮之滋味柔嘉交趾諸郡有之交州記曰高大如木瓜而小傾邪不周正本草曰鬼目一名東

方宿一名連蟲陸名羊蹄

晉惠帝元康二年二月巴西郡界草皆生花結子如麥可食時帝初即位楚王瑋矯詔誅汝南王亮及太保衛瓘帝不能察今非時草結實此恒燠寬舒之罰 安帝

義熙二年九月揚武將軍營士陳蓋家有苦蕒菜莖高四尺六寸廣三尺二寸厚三寸亦草妖也此殆與吳終同象識者以為苦蕒者買勤苦也自後歲歲征討百姓勞苦是買苦也十餘年中姚泓烏宏反滅兵始戢是苦蕒

之應也 義熙中宮城上及御道左右皆生蒺藜亦草
妖也蒺藜有刺不可踐而行生宮牆及馳道天戒若曰
人君不聽政雖有宮室馳道若空廢也故生蒺藜
宋明帝泰始四年春正月丙辰朔雨草於宮
陳后主末年臨平湖草久塞忽然自通

魏太武太延元年有嘉瓜合蒂生於中山

隋高祖時上黨有人宅後每夜有人呼聲求之不得去
宅一里所但見人參一本枝葉峻茂因掘去之其根五

尺餘具體人狀呼聲遽絕蓋草妖也視不明之咎時晉王陰有奪宗之計高祖不悟聽邪言廢無罪因此而亂也

唐武德四年益州獻芝草如人狀占曰王德將衰下人將起則有木生為人狀草亦木類也景龍二年岐州郿縣民王上賓家有苦蕒菜高三尺餘上廣尺餘厚二分近草妖也三年內出蒜條上重生蒜蒜惡草也重生者其類衆也四年京畿藍田山竹實如麥占曰大

饑 開元二年終南山竹有華實如麥嶺南亦然竹並

枯死是歲大饑民採食之占曰竹栢枯不出三年有喪

十七年睦州竹實 元和十三年八月鹽鐵使奏郾

城上蔡等縣生菽蓰草引蔓結實味甘人賴為食 大

和九年冬鄭注金帶有菌生近草妖也 開成四年六

月襄州山竹有實成米民採之 光啟元年七月河中

解永樂生草葉自相樛結如旌旗之狀人以為旗子草

二年七月鳳翔麟游草生如旗狀占曰其野有兵

宋乾德四年渭州范裕獻嘉蓮一莖二花

符瑞志所載雙頭花甚多

不及
悉書

太平興國七年八月知易州白繼贊獻合歡瓜

知河南府焦繼獻合歡牡丹花 大中祥符四年四月

江陵府刑部郎中袁煒家圃芍藥雙華並萼

符瑞志所載蓮牡丹

芍藥甘瓜雙生者甚多不
悉錄各撫其一以備異聞

咸平二年知黃州張鑑獻

瑞草二本九月鄂州武昌縣生異草如栢色瑩白枝葉

傳地如繡 淳化三年知開州趙得忠獻忘憂草圖花

萼相重而生 咸平二年閏三月宣池歙杭越睦衢婺

州箭竹生米如稻時民饑採之充食 大中祥符三年

四月京師竹有華占主歲不登 天禧元年四月邵州

邵陽縣竹上生穗如米居民饑乏食採食之又饒州浮

梁縣山竹生穗如米 慶歷元年二月丙午京師雨藥

熙寧六年十二月徐州滕縣官舍生異草經月不腐

元豐二年六月忠州雨豆 元豐間眉州梓州處州

俱生瑞竹 元祐三年六月忠州臨江縣雨白黍又雨

黑黍 大觀元年廬州雨大豆 政和四年八月建州

言境內竹生米數千萬石 五年十一月癸酉越州言
承天寺瑞竹一竿七枝枝幹相似其葉圓細生花結實
紹興十六年正月辛未瀘州雨豆豆生於地自天而
下近草妖也 二十一年饒州鄱陽縣石門民家籬竹
生重萼牡丹又民家竈鼎生金色蓮花萬州虔州汀州
俱有蓮同蒂異萼

穀異 野穀 竹米

周唐叔得禾異畝同穎

唐叔於其食邑內得異禾畝隴穎穗也禾各生一壟而合為一

穗故異也

獻諸天子王命唐叔歸周公於東

異畝同穎天下和同之象周公

德所致周公東征未還故命唐叔以禾歸周公

作歸禾周公既得命禾旅天子

之命

旅陳也陳成王歸禾之命而推美成王善則稱君

作嘉禾

漢哀帝建平元年光武生於濟陽縣舍時皇考南頓君

為縣令是歲縣界有嘉禾生一莖九穗因名光武曰秀

後漢光武建武三年野穀旅生

旅寄也不因播種而生故曰旅今字書作稽音

呂古字通

麻菽尤甚被於山阜人收其利焉

明帝永平十

一年嘉禾生

安帝延光二年九真言嘉禾生

東觀記曰禾一

百五十六本七
百六十八穗

桓帝建和二年嘉禾生大司農帑藏

魏陳留王咸熙二年安彌福祿縣各言嘉禾生

吳孫權黃龍三年由拳野稻自生改為禾興縣會稽南

始平言嘉禾生 赤烏七年宛陵言嘉禾生 孫亮時

交趾稗草化為稻

詳見草
異門

晉惠帝元康二年竹結實如麥

又有草結實如
麥俱見草妖門

安帝

元興三年荆江二州界竹結實如麥

宋孝武帝孝建二年清景殿西薨鷗尾中央生嘉禾一

株五莖乃以清景殿為嘉禾殿

梁武帝中大同三年秋吳興生野稻飢者利焉

魏太武太延元年嘉禾合秀於恒農

唐開元二年竹結實如麥 十九年四月揚州奏穠生

稻二百一十五頃再熟稻一千八百頃其粒與常稻無

異 元和七年十一月梓州上言龍川界嘉禾生 開

成四年六月襄州竹成實如米 大和二年福建進瑞

粟一十莖 大中二年七月福建觀察使殷儼進十莖

莖有五六穗 六年九月淮南節度使杜棕奏海陵高
郵兩縣百姓於官河中漉得異米煮食呼為聖米 天
祐元年七月河南府奏穀水村內嘉禾合穗
後唐天成四年七月遂州進嘉禾一莖九穗

蜀王建武定二年廣都嘉禾合穗

宋乾德二年十月眉州獻禾生九穗圖 四年六月果
州南充縣民何約田禾一莖十三穗一莖十一穗七月
又生一莖九穗 開寶八年八月嘉州解有禾一莖十

四穗生庭中河間府寶鼎縣民張知友田禾隔四壠相
去二尺許合穗 太平興國三年懷安軍金水縣民田
禾一莖三十六穗 六年召近臣觀嘉穀於後苑有七
穗至四十八穗者 七年八月府州府谷縣民劉善田
禾隔三壠合成一穗遼州平城縣民田禾隔二壠至五
壠合穗有十三本或二十一莖合為一者 天禧元年

竹成米

見草異門

五年四月襄州襄陽縣民田穀穠生成

實 乾德四年澶州濮陽縣民李溫田麥兩歧三歧四

岐各五十本五岐二十本六岐五本 淳化五年亳州

永城縣麥一莖三穗四岐同榦者三十本 咸平二年

竹生米

見草異門

景德二年梓州麥五岐 大中祥符四

年五月唐汝廬宿楚泗濠州民田麥自生其六月壽州

六安縣民田穰生麥八十餘頃 天禧五年四月襄州

營田務麥自生者四頃餘 太平興國四年八月宿州

符離縣淠湖穰生稻民采食之味如麴謂之聖米 淳

化五年温州靜光院有稻穰生石罅九穗皆實 大中

祥符三年二月江陵公安縣民田獲穠生稻四百斛
至道二年四月福州福清縣解雨黃黑豆又長樂太平
二鄉雨黑豆皆堅實異常 大中祥符六年二月泰州
管內四縣生聖米大如芡實 九年慶州安化縣民王
景溫田秣一粳二米

右三朝瑞符志載自乾德以來至天禧郡縣所上
嘉禾異麥野穀之屬殆不勝書姑撫其尤異者一
二著於此

天聖元年六月蘇秀二州湖田生聖米飢民取之以食
興州竹有實如大麥民取以食占曰大飢 慶歷七年
渠州言石照等五縣野穀穰生民飢之候也 熙寧三

年安州麥一本三穗至五穗凡十四莖深州麥秀兩岐
或三四穗凡四十畝 四年徐州麥一本百七十二穗
八年杭州鹽官縣自三月地產物如珠可食水產菜
如菌可為菹飢民賴之定州安喜縣禾二本間五隴合
穗成德軍平山縣禾合穗者二保州保塞縣禾七本間

一壠或兩壠合穗 九年渠州流江縣禾一苗九穗

元豐元年武康軍禾一莖十一穗 二年袁州禾一莖

八穗至十一穗皆層出長者尺餘洪州六縣稻已獲再

生皆實 元祐三年劍州安國軍麥秀兩岐夔州苗十

二穗潤州丹陽縣麥一本五穗 四年嘉州峨眉縣禾

異畝同穎又禾登一百五十三穗 五年汀州禾生三

十六穗 六年南劍粟一本三十九穗 紹聖元年淮

南軍禾一本九穗 五年淮西路民田既刈復生實

政和二年知定州梁子野奏嘉禾合穗一科相隔五壟計六尺三寸生為一穗并中間壟內一科三莖上生粟三穗蔡州麥一莖兩岐至七八岐者近約十畝遠或連野台州進寧海縣早禾一稔二米者凡五石時方修明堂遂叶典禮詔拜表稱賀

右四朝志載自熙寧以後至於宣政禾同穎麥兩岐之事尤多不及悉書

芝草 朱草

漢武帝元封二年甘泉宮內中產芝草九莖連葉

瑞應圖王

者敬事耆老不失故舊則芝草生內中謂後庭之室也

宣帝神爵元年金芝九

莖產於函德殿銅池中

金芝色象金也銅池承雷也以銅為之函與舍同

後漢光武中元元年夏京師醴泉湧出又有赤草生於

水崖

赤草朱草也大戴禮曰日生一葉至十五日以後日落一葉周而復始

明帝永平

十七年芝草生殿前章帝建初四年零陵獻芝草

五年零陵獻芝草桓帝建和元年芝草生中黃藏府

中黃藏府掌中幣

帛金銀諸貨物

靈帝光和四年二月郡國上芝英

草

唐武德四年益州獻芝草如人狀

占見草異門

貞觀十七

年九月皇太子寢室中產素芝十四莖並為龍鳳之形

天寶初臨川郡人李嘉允屋柱生芝草狀如天尊像

上元二年七月甲辰延英殿御坐上白芝一莖三花

白喪象也 貞元十二年七月東郡留守秦苑内生芝

草一株 長慶元年七月壽昌殿內槽柱上產玉芝一

莖長九尺

後唐同光二年九月萊州奏即墨縣人李夢徵室內柱上生芝草兩本畫圖以進 長興三年十月萊州奏即

墨縣人王友家生芝草一本三枝分兩岐或三岐上漸相向成片而圓色紫葉莖一色其表白高尺餘

上命宮中舊進

芝草四本
色莖皆同

周顯德元年河陽奏汜水縣民家生紫芝數莖

南漢劉鋹時芝菌生宮中

宋建隆二年七月亳州獻芝一株 開寶七年陳州獻

芝一本四十九莖 太平興國四年華山道士丁少微

獻彤芝黝芝各一筭 五年真定府行宮殿梁生芝草

如荷葉 八年十一月歙州婺源縣民王化於王陵山

石上得紫芝一本叢生五莖 咸平四年濰州獻芝草

一本如佛狀 六年永康軍導江縣民潘矩田生芝一

莖三層黃紫色其高五寸許九月相州牧龍坊生芝一

莖色紫黃長尺餘分七枝枝皆如手五指狀其最上枝

類鳳首 大中祥符元年東封遣官祭文宣於孔林得

芝五株色黃紫如雲氣及人戴冠幘之象詔遣內侍祭
謝復得芝四本輕黃如雲氣之狀東封經度制置使王
欽若言親獲芝十一本又州民所得二十六本且言泰
山日生靈草軍民競採請量給緡錢絹帛從之欽若來
朝獻芝草八千一百三十九本有貫草木附石連理及
飾為寶山者九月趙安仁來朝獻五色金玉丹紫芝八
千七百十一本十月泰山芝草再生者甚衆辛丑車駕
次鄆州知州馬元方獻芝草五本甲辰欽若等又獻泰

山芝草三萬八千二百五十本有並五並三連理五色

重暈如意寶蓋上下相連帶瓦石草木五穀如寶山神

仙靈禽瑞獸之象者六百四十二詔令封禪日列天書

輦前送諸路名山勝境及賜宰相是月復州獻芝草三

本類神仙佛像河中府酒厨梁上生芝一本十二葉其

色如玉 六年奉祀經度制置使丁謂至亳州真源縣

太清宫道士瀨陽鄉民繼獲芝草八十一本以獻己丑

又獲二百五十本有一本三莖一莖三蓋如雲氣佛像

者九月又得應天府宋城縣所獲芝五十本獻之十一月謂來朝獻芝草三萬七千一百八本飾以仙人寶山靈禽異獸之狀十二月獻九萬五千一百本明年車駕至真源縣置二百輿前導民有詣行闕獻者又一萬八千本

按三朝符瑞志載天禧以前草木之瑞史不絕書而芝草尤多然多出於大中祥符以後東封西祀之時王欽若丁謂之徒以此導諛且動以萬本計

則何足瑞哉姑存其略云

熙寧四年至元豐八年天下言芝草凡三十七 建中
靖國元年至宣和靖康天下言芝草尤多 政和二年
二月戊午河南府新安縣蟾蜍背生芝草自是而後祥
瑞日聞玉芝產禁中殆無虛歲凡殿宇園苑及妃嬪位
皆有之外則中書尚書二省太學醫學亦產紫芝 五
年八月甲子蘄州進一萬二千六百枝內一枝紫色九
幹十二月己未汝州至進六萬本其間連理雙枝者一

千八百八十有司不勝其紀初猶表賀後以為常不皆
賀也時朱勝非為京東提舉學事行部至密州界見縣
令部數百夫入山採芝彌漫山谷皆芝菌也或附木石
或出平地有一本數十葉層疊高大衆色咸備郡守李
文仲採及三十萬本每萬本作一綱入貢文仲尋進職
除本道轉運使云 建炎二年九月癸卯密州獻芝草
五葉如人指掌色赤而澤卻之東漢書以草生如手指
為秉威權持國柄蓋黃潛善汪伯彥誤國脅上之應也

十八年梅州學廟生芝草二十一年紹興府府學
御書閣下生芝二十五年五月太室楹生芝九莖宰
臣秦檜帥百官觀芝稱賀自檜既相和讎罷兵文飾太
平天下競以草木之妖獻瑞慶元五年八月太室西
北夾室楹生白芝四葉唐書以白芝為喪祥明年八月
國連有大喪嘉泰二年十一月祕書省右文殿楹生
芝二莖

青青青祥

五行志以鼠妖為青
青今削之自有專門

後漢桓帝永興二年四月丙午光祿勳吏舍壁下夜有青氣視之得玉鈎玦各一鈎長七寸二分周五寸四分身中皆雕鏤此青祥也玉金類也七寸二分商數也五寸四分徵數也商為臣徵為事蓋為人臣引決事者不肅將有禍也時梁冀秉政專恣後四歲誅滅靈帝光和元年七月有青虹見御座玉堂後殿庭中

晉武帝咸寧元年八月丁酉大風折大社樹有青氣出焉此青祥也占曰東莞當有帝者明年元帝生是時帝

大父武王封東莞由是徙封琅邪孫盛以為中興之象
晉室之亂武帝子孫無子遺社樹折之應又恒風之罰
唐貞觀十七年四月立晉王為太子有青氣遶東宮殿
始冊命而有祲不祥 十八年六月壬戌有青黑氣廣
六尺貫於辰戌其長亘天 大和九年鄭注篋中藥化
為蠅數萬飛去注始以藥術進化為蠅敗死之象近青
青也 乾元三年六月昏西北有青氣三

文獻通考卷二百九十九